

Prome Minister Mike Eman ta recorda su gran amigo Wubbo Ockels

Un persona inspirativo cu ainda tabatin hopi pa brinda mundo


“CU fayecimento di Wubbo Ockels nos ta perde un guia cu tabata indica nos e caminda pa un mihor mundo. Como pionero riba tereno di durabilidad e tabata e portavoz di e consenshi di cada un di nos. Mayoria bes den forma amabel, pero tin biaha tambe si tabata necesario den forma determinante, e tabata recorda nos riba nos obligacion pa pasa e mundo aki den un mihor condicion p’e generacion cu ta bin. Wubbo Ockels a reacciona masha entusiasma riba nos invitacion pa bin Aruba cu su boto Ecolution y pa pone su experticio disponibel pa yuda cu Aruba su mision pa na 2020 ta 100% duradero.

Inspira cu Ockels tabata, e no a laga esaki keda na palabranan sabio so. El a bishita scolnan pa convence e hubentud di Aruba cu durabilidad no solamente ta necesario, pero tambe algo hopi leuk. Nos no ta tuma solamente despedida demasiado tempran di nos Embahador di un Happy Green Aruba, pero tambe di un amigo di berdad. Un persona inspirativo cu ainda tabatin hopi pa brinda mundo”.

Wubbo Ockels a sera conoci cu Prome Minister Mike Eman na 2010 y a keda impresiona p’e pasion di e prome mandatario di pais Aruba. Durante e prome encuentro aki Eman a papia di Aruba, su soño pa haci e isla bira 100% duradero, pero tambe di husticia social y pa logra tin un mihor Aruba.

Ockels no tabata conoce Aruba, pero a base di loke Eman a cont’e a bira entusiasma y tabata un di e oradornan di e prome Green Aruba Conference na september 2010. Green Conference tabata un exito grandi. Di aki un amistad profundo a nace basa riba respet pa otro. Riba invitacion di Mike Eman, Wubbo Ockels, su señora, Javier St.Jago y un crew chikito den e boto Ecolution a sali dia 5 di november 2012 for di Scheveningen direccion Aruba. Un biahe yen di aventura.

Dia 20 di januari 2013 e bapor



a drenta waf di Aruba. Un happening grandi. Minister Plasterk tabata presente pa hunto cu Minister President Eman, Gobierno di Aruba y un multitud inmenso yama bon bini na e homber cu a caba di realiza un biaha increibel, Wubbo Ockels. Cu e Green team Ockels a bishita tur scol secundario na Aruba pa papia riba durabilidad cu e hobennan. Algo cu semper a haya bon acogida.

Den e buki cu Rene Zwart over di Mike Eman ‘Visie, passie en lef’ Wubbo Ockels a skirbi un introduccion. Na final e ta skirbi: ‘Mundo mester bira duradero. Nos no tin escogencia. Ta solamente un futuro tin y esey ta un futuro duradero. Mi ta convenci cu nos por tin un mundo duradero’. Na final e ta bisa cu su amigo Mike Eman ta un ehempel pa otro lidernan y cu e ta spera pa Aruba bira ‘A one Happy Sustainable Island, un showcase pa Reino’. Cu baymento di Wubbo Ockels Aruba a perde un bon amigo. Un hende cu tabata stima e isla y su hendenan. Mester percura awor pa su herencia, su perseverancia y inspiracion keda intacto y sigui inspira nos den e trabou riba durabilidad cu nos a pone nos dilanti.

Pa termina un quote di John F. Kennedy na momento cu a manda hende riba luna y otro decisionnan dificil cu mester tuma. Un quote cu Ockels y Eman na varios ocasion ta haci uzo di dje y den e caso aki e ta completamente na su lugar.

“We do them not because they are easy, but because they are hard”.

